

東

華

續

錄

東華續錄

臣王先謙

臣周綱蕃恭校

嘉慶十九年甲戌春正月丙寅諭上年逆匪突入禁門時恍惚之中望見 闕帝神像畏懾奔竄本日又據那彥成奏當滑縣克復之時賊匪於黑夜拚命突圍官兵施放槍箭未能真切忽城旁廟宇自行起火照同白晝官兵兩路夾擊始將賊匪截回悉數殄除事定後乃知城旁廟宇供有 闕帝神像廟雖焚毀 神像歸然獨存毫無損動等語此次逆匪滋事屢荷 闕帝靈爽翊衛實深寅感著該衙門於原定封號敬擬加封二字進呈候朕酌定通頒直省用答 神庥其滑縣廟宇俟重修落成之日該撫再行奏請朕御書扁額敬謹懸挂尊加封仁勇二字並頒滑縣廟宇 御書

扁額○己巳諭前據侍郎吳璥請開捐例當交戶部覈議具奏茲據潘世恩蘇楞額議請暫開捐例盧蔭溥桂芳趙秉冲議請常例推廣加增托津因甫經回京二摺俱未列名推廣常例事多格礙難行暫開捐例能否於經費有裨或於此二議外別有良策可裕國用著派曹振鏞托津鐵保英和四人再行妥議具奏尋議上得旨前據吳璥奏開捐例朕以捐例本非善政恐無實濟而徒滋流弊特交戶部覈議嗣經部臣兩議奏上其請推廣常行事例者既窒礙難行其請暫開捐例者亦未能確計其足裨國用因再降諭旨派曹振鏞托津鐵保英和四人另行妥議旋據英和單銜具奏極言捐例之弊而其所陳裕國之策一請仍復名糧之舊一請多開礦廠名糧一節前已飭查覈辦若開礦流弊滋多亦不可行本日據曹振鏞等三人議上仍以暫開捐例爲請見在軍需河工各

項動用均出常年經費之外國家度支有常實不能不豫爲籌備  
斯時既別無善策姑照所請暫開豫東事例著各該部會同妥議  
條款具奏此朕萬不得已之舉非以捐例爲必可行也諸臣食君  
之祿皆當忠君之事除此次曾經交議者無庸再行瀆奏外其餘  
各大臣果有真知灼見能爲裕國之策者必須字字確切毫無流  
弊不准泛作紙上空談仍犯議論多而成功少之病如確有把握  
立能濟軍需河工之用奏上時朕採取施行卽將捐例停止若止  
言捐例之弊而別無良謀其言皆朕所稔知無庸虛陳奏牘也○  
庚午諭軍機大臣等同與等奏山東軍需已支用者七十餘萬尙  
有各州縣應行裁領之項統計約須百萬懇請一槩無庸報銷在  
通省地方官養廉內攤捐分十年歸款等語所辦非是此次賊匪  
滋事山東省曹定一帶雖有剿捕事宜但官兵在本境剿賊供支

有限如京營吉林黑龍江勁旅以及陝甘他省官兵皆未到境何至軍需用項計有百萬之多此必局員等濫支濫應漫無樽節因恐報銷致干飭駁遂倡爲通省捐廉之說無所稽察以便浮開冒混不思國家辦理軍需例應作正開銷部臣句稽考覈應准應駁皆有一定準則豈容臣下博捐輸之名而轉遂其冒濫之實所奏不准行該撫卽督率局員速將軍需支款按照定例覈實報部毋任絲毫浮冒○甲戌 上廷訊牛亮臣馮克善硃於市○丙子諭軍機大臣等長齡等奏連日痛勦匪徒孳獲僞軍師僞先鋒及催兵分路進勦緣由一摺南山匪徒烏合之眾不早撲滅一經蔓延各處完善之區遭其蹂躪勞師糜餉其患豈可勝言著勒限於正月底二月初一律辦竣不准遲逾此時辦理之法先須顧定平原勿令出山焚劫尤不可令其竄入老林惟當四面堵截使賊所向

輒窮我兵皆新勝之師勇氣百倍又吉林黑龍江勁旅一可當百  
必能計日蒞功見在萬五一股經吳廷剛節次痛勦贖有數百人  
遁往太白山陳四尤九一股向甯陝一帶奔竄祝廷彪帶兵由子  
午峪向西截擊麻大旗劉二一股千餘人竄往隴州楊遇春已親  
自馳往勦辦冀貴一股千餘人竄至兩當太陽寺地方有副將何  
占鰲等在彼勦捕吳孤孤一股千餘人楊芳即日帶兵前往截勦  
見又有旨飭催賽沖阿等由川迎擊著長齡迅速飭知各路領兵  
大員督率所帶官兵分投痛勦窮追如某人勦某股之賊此一股  
卽責成該員一手辦淨不可得一勝仗棄而之他致勦敗之賊又  
裹成一夥長齡係總統大員居中調度察看何處兵單卽將辦淨  
一股之勝兵飭令前往協助○己卯諭和世泰等奏本月十九日

祈穀壇大祀前期詣壇齋宿豫備禮輿一招向來恭遇南

郊大祀朕前一日詣壇例皆乘輦上年冬至乘紅桿八人轎係特減損儀文虔申告祭茲該衙門因昇輦旗尉尙未嫻習請乘禮輿試思詣壇乘輦載在儀注典禮攸關向來出宮進壇兩班本用旗尉惟中間換班沿用民尉上年定議全用旗尉得旨已將兩月何以尙未教演嫻熟顯係因循怠玩藉詞支飾所有鑿儀衛堂官除長慶甫自軍營回京無庸議外和世泰孟住德克進及該管章京等俱著交部議處朕此次詣壇姑乘禮輿見距常警之期尙有數月著該衙門將昇輦旗尉勤加教演屆期毋得再因循貽誤致干嚴懲不能恕矣○庚辰諭軍機大臣等長齡前任河南巡撫逆犯李文成等本皆該省民人私與林清勾結往來約期造反長齡職任封圻毫無覺察上年將伊簡任烏魯木齊都統離任未久豫省逆賊旋即起事究其蓄謀年月正在長齡任內厥罪

與溫承惠等未加懲處並因那彥成督兵豫省一時乏人將伊簡放陝甘總督伊甫抵任南山亂民滋事非伊之咎但伊積愆甚重此時帶兵勦賊正當奮身自贖目下征兵雲集足敷調度如果於一月內剋期蕙事不但寬免前罪仍當懋加獎賞若辦理延玩則二罪並罰朱勳久任陝西藩司擢任巡撫南山距省甚近飢民乏食滋事該撫不能先事豫防迨焚掠肆擾又未能立時勦辦意存招撫其所派招賊之人旋經被賊戕害辦理種種不妥亦與溫承惠長齡無異姑令戴罪自贖著將應需軍火糧餉實力經理不准糜費如果糧餉無誤防堵嚴密俾征兵得以迅速竣事尙可贖其前罪若怠玩貽誤不能寬貸矣至楊遇春謀勇素著因陝西亂民滋事又派令帶領吉林黑龍江勁兵馳往會勦該提督務協同長齡等鼓勵將士一鼓蕩平蕙事後仍再加以上賞以獎勵勞將此

各傳諭知之○壬午諭上年冬閒據陝西巡撫朱勳奏稱岐山縣三才峽地方有飢民聚眾滋事之案查係萬五爲首該逆等因木商停止工作無慮傭工輒敢糾人焚掠不法已極當派長齡楊遇春前往督辦本日據長齡等奏稱萬五股匪經吳廷剛帶兵連次追剿殲獲匪黨多名該逆窮蹙奔潰由太白老林竄入蓋屋山內長齡復派副將達凌阿參將丁永安帶兵協剿於山內設伏以待該逆竄出寬溝伏兵槍箭齊發該逆身帶槍傷經眼目縣役江貴認明擒獲餘匪剿除淨盡等語萬五一犯乘機倡亂實爲首惡茲經官兵臨陣生擒餘黨悉數殄除一月以內均係吳廷剛奮力追剿不予以暇該逆無路奔逃故得迅速成擒吳廷剛著加恩交部照軍功例從優議敘達凌阿丁永安探蹤設伏能將首逆生致實屬奮勉達凌阿著加恩賞加總兵銜丁永安著加恩賞加副將銜

仍交部照軍功例從優議敘其縣役江貴賞給八品頂帶入伍以

外委卽補以示獎勵○以戴均元爲吏部右侍郎吳璫爲河東河

道總督由吏部右侍郎選○癸未以許兆椿爲刑部左侍郎慶保爲貴州

巡撫調常格爲江蘇布政使福昂爲浙江布政使以常發祥爲貴

州布政使調陳若霖爲四川按察使以嚴煥爲湖北按察使肅州道

○命自立春以後定擬逆犯情節次重者量從輕減○甲申

諭軍機大臣等長齡等奏洋縣竄匪踰淺過江分別督辦一摺此

股竄渡漢江之賊同日據賽沖阿奏到該將軍行抵沔縣因聞該

匪等渡江竄至八寶臺卽移兵洋縣先辦此股竄匪其沔縣黑河

之賊已派甯羌遊擊林向榮帶領甯羌陽平弁兵五百名在彼堵

勦已降旨令賽沖阿督同楊芳祝廷彪先將渡江之賊勦捕完竣

再移兵會勦他股並令多隆武督率桂涵羅思舉嚴防黑河之賊

南竄其麻大旗一股賊匪人數不少著楊遇春迅速追剿並就近督辦竄近微縣零匪至蓋屋峪內尤九陳四股匪著長齡督率吳廷剛等趕緊辦竣此次賊眾多係山內匪徒其意總欲四出亂竄分我兵力總當注定成股之賊痛剿窮追使其無裒脅之暇無掠食之資方能迅速掃除長齡等務勉力速辦勿稍遲延○丁亥諭軍機大臣等蘇楞額奏嚴禁海洋私運一摺據稱近年以來夷商賄通洋行商人藉護回夷兵盤費爲名每年將內地銀兩偷運出洋至百數十萬之多該夷商已將內地足色銀兩私運出洋復將低海洋錢運進任意欺蒙商賈以致內地銀兩漸形短絀請旨飭禁等語夷商交易原令彼此以貨物相準俾中外通易有無以便民用若將內地銀兩每年偷運出洋百數十萬歲積月累於國計民生均有關繫著將攸銛祥紹查明每歲夷商等偷運足色銀兩

出洋實有若干應如何酌定章程嚴密禁止會同妥議具奏○戊子諭本日那彥成來京復命並陳自滑縣凱撤經過直隸山東沿途地方民情極爲甯謐上年河南滑潯等縣逆匪滋事特命那彥成山陝甘馳赴豫省授以欽差大臣關防總統師干經朕疊加訓飭那彥成感奮自效連奏克捷兇渠授首逆黨悉除辦理迅速完善那彥成克副委任深堪嘉獎伊係阿桂之孫亦由平日習聞祖訓勉紹家聲故能宣力效猷懋膺爵賞茲追念舊勳著於本月二十九日在阿桂墓次賜祭一壇著禧恩前往奠酒用示朕眷舊酬庸恩意○己丑諭軍機大臣等長齡等奏勦淨麻大旗等股匪寶隴肅清其尤九陳四一股經吳廷剛等追至甯陝地方冒雪進攻殲擒七百餘名並生擒僞元帥尹朝貴等嗣賊匪分起東竄又經參將張起熬勦斃三百餘人賊勢已就衰敗惟此股餘匪見復逃

至鎮南甯陝交界地方該處路通楚豫亟須併力擱截長齡已派馬元帶兵一千名赴陝州一帶截剿尙恐兵力不敷見在後起凱撤官兵二千名過陝著卽交長齡截留協剿長齡並可於此內酌撥數百名飭知帶兵將領就近取道趕赴馬元一路幫同堵截卽將竄匪就地剿盡勿令竄近豫境爲要再楊遇春見已將麻大旗等一股賊匪辦竣其吳孤孤龔貴股匪竄至沔縣黑河一帶滋擾賽沖阿移兵洋縣以後僅派遊擊林向榮帶兵五百名堵遏兵力太單恐該匪等四處裹脅人數漸增楊遇春由寶隴一帶前赴沔縣甚近著卽帶領勝兵探明吳孤孤龔貴二逆見在屯聚何處卽星馳趕赴先將此股賊匪悉數剿除毋令旁竄○庚寅諭軍機大臣等本日據賽沖阿奏稱該將軍追剿渡江竄匪於本月十九日追至木竹壩地方適遇該匪由老漁壩竄至該將軍親身督戰將

賊首楊榮孥獲戮斃賊匪五百餘名其後隊苗小一所帶綠號匪眾千餘竄回漢江北岸該將軍仍帶兵緊躡等語此時漢江以南已就肅清川北可以無虞此股折回江北之賊賽沖阿乘勝追勦當亦不難辦淨惟吳孤孤翼貴等股匪前據奏稱在黑河沔縣一帶游奕楊遇春勦淨麻大旗二股之後已飭令移兵前往日內會否趕上痛勦不致散竄又吳廷剛所勦尤九陳四一股昨據奏稱逃往甯陝鎮安一帶馬元帶兵攔勦曾否截回均爲垂廬著長齡等迅卽具奏再本日賽沖阿奏到賊匪楊榮供內據稱該匪等起事之初分成五號黃號係僞總兵段姓紅號係楊二劉濫子綠號係苗小一尤九藍號係僞總兵黃姓該匪係青號頭目並據供稱綠號尤九因擄掠婦女被苗小一將伊殺斃等語此五股賊匪除紅號楊二於投首之後赴賊營招降被殺青號楊榮此次擒獲正

法綠號苗小一見經賽沖阿追勦外其餘黃號段姓見在洋縣河  
北岸藍號黃姓見竄往五郎山紅號劉濫子見在何處竄逸是否  
卽在沔縣黑河及甯陝等處賊股之內抑另自分竄他往又綠號  
尤九一犯既據供稱已被苗小一殺斃何以該督等摺內俱稱尤  
九與陳四一股在蓋屋山內奔竄是否尤九實未被殺賊供難信  
抑與陳四奔竄者並非尤九均著查明先行覆奏○壬辰以成書  
爲泰甯鎮總兵官轉果齊斯歡爲兵部左侍郎調曹恭爲兵部右  
侍郎轉禧恩爲理藩院左侍郎以那彥寶爲理藩院右侍郎由副都統

二月甲午 上御經筵○丁酉長齡奏生擒首逆陳四並尹朝貴  
零匪全數殄滅得旨獎賚下部議敘賞總兵官視廷彪吳廷剛提  
督銜○壬寅諭向來雲南土貢例進銅鑪浙江歲進嘉鑪湖鏡兩

淮歲進銅火盆相沿已久歷年所積宮中存貯者甚多朕愛惜物力思以有用之銅斤度之無用之地殊爲虛擲見在錢局官銅未爲豐裕若省此耗費俾廣爲流通於鼓鑄不爲無益著傳諭該督撫鹽政此數項銅器嗣後均無庸呈進則鑄造少而地寶胥歸利用矣○以殲斃逆首苗小一功封賽冲阿二等男爵賞雙眼花翎

○以哈甯阿爲內閣學士

由太常寺卿遷

○癸卯諭軍機大臣等長齡等

奏勦滅吳孤股匪並將首逆吳孤吳奇殲斃一摺見在各股賊匪次第掃除惟賸有張占鰲小股七百餘人由沔縣旁竄譚貴亦在內楊芳等已乘勝追勦諒可卽日辦竣其龔貴股匪竄入黑河老林賊夥不過八九百人若在平地不難一戰殄除今老林內灌木叢雜兵力不能施展長齡楊遇春各派總兵特依順保副將何占鰲分帶弁兵步行入林投勦該匪等困獸猶鬪潛伏叢莽之

中若乘官兵不備戕害將士卽兵丁稍有傷損已屬不值若得力將弁更當慎重保全此等殘敗之賊卽譚貴龔貴等均不須按名生擒但將首夥殲斃卽可竣事與其冒險接林不如用火焚燒或槍礮轟擊乘其竄出時扼要堵截聚而殲旃較爲妥善長齡等相機辦理勿遲滯亦勿冒昧○丙午諭軍機大臣等松筠等奏駁飭霍罕來使見已傾心感服一摺該夷使回霍罕後如果愛瑪爾遵奉飭駁不敢再請則已如再來瀆請卽當諭以爾霍罕部落不過邊外小夷天朝准令來往貿易已屬格外恩施今爾敢爲無厭之請試思天朝之人豈無在爾處貿易者在爾境內添設官員稽查稅務向無此例天朝尙不肯爲越境之事爾何得妄行生心欲於天朝境內違例妄爲此後爾若不恭順小心遵守法度卽當通飭各卡倫不准爾處之人前來貿易如此嚴切曉諭愛瑪爾自不

敢再行妄請松筠見已由喀什噶爾起身卽將此旨傳知恩長等遵照妥辦○庚戌諭禮部奏請定宗室王福晉以下奉恩將軍恭人以上已故嫡室追封典例一摺向例外藩王公嫡室已故准與繼室一同請封卽內外官員嫡繼正室例准並給封典本禮經婦從夫爵之義何以宗室王福晉以下奉恩將軍恭人以上已故嫡室轉例無請封明文自係從前遺漏所有宗室王公以下奉恩將軍以上其嫡室已故未經請封者俱准其呈請追封該衙門卽纂入例冊永遠遵行○辛亥諭軍機大臣等長齡等奏生擒首逆龔貴餘匪剿除淨盡並張占鰲股匪經楊芳等追剿殄除所辦甚好見在各路成股賊匪俱已辦完惟譚貴傅老八龍正光喜兒劉濫子余姓數犯未經就獲該匪等竄匿山林若不迅速殲除恐又裹脅爲患長齡等派兵分別接捕務須按名辦竣勿留遺孽長齡等

察看南山內外全行肅清卽與賽沖阿等連銜馳奏發摺後賽沖阿卽帶領弁兵凱撤回川其陝省善後事宜長齡與楊遇春等會商辦理○以生擒逆首顏貴斌盡餘匪賞長齡騎都尉世職並花翎晉封楊遇春一等男爵○以周系英爲兵部右侍郎學士遷○丙辰諭松筠奏查明喀什噶爾已革阿奇木伯克玉努斯邀功妄殺四命並其餘苦累回眾各款一摺前此鐵保任喀什噶爾參贊大臣時曾據玉努斯稟報有回眾等私斂金錢送給薩木薩克之子一案當經審辦奏請將回子毛拉素皮烏舒爾愛瑪爾沙朵斯四名正法茲據松筠查明此案情節均係玉努斯同伊莫洛伯克阿布都拉仔斯商量捏造其所云攢湊金錢等物竟係玉努斯自行備出並將伊父伊斯堪達爾從前招降薩木薩克原書添寫捏造毛拉素皮帶來憑據酷刑取供見在該處大小伯克阿潭等人

人痛恨稱冤經松筠查訊得實覆訊玉努斯審擬治罪先將鐵保等參奏請旨等語鐵保前在兩江總督任內王伸漢謀毒李毓昌一案毫無覺察將伊褫革發遣旋又棄取錄用授爲喀什噶爾參贊大臣洊升吏部尙書乃前於玉努斯編造謠言刑求無辜不加詳勘致成冤獄枉殺四命其咎甚重且伊前此辦理阿克蘇錢局一案見被革員官成控告多款可見伊在新疆時仍前溺職自任吏部所言甚屬謬妄毫無膽氣竟是無能廢物不能屢恕鐵保著革職發往吉林交該將軍富俊等派撥當差其原任喀什噶爾幫辦大臣伊犁總兵哈豐阿著革職發往烏魯木齊當差當日隨同審辦之額外主事豐安主事銜拜凌阿均著革職發往伊犁效力至恩長玉福二人接任在後未經審辦此案但不能查出參奏且又有失察玉努斯縱容護衛家人囤糧貴賣苦累回民之事恩長

玉福著交部嚴加議處○命陝西被賊地方各幼孩無家可歸者  
 官為收養○調英和為吏部尚書以蘇楞額為工部尚書調果齊  
 斯歡為戶部左侍郎轉普恭為兵部左侍郎調常福為兵部右侍  
 郎轉徵瑞為工部左侍郎調穆克登額為工部右侍郎轉成格為  
 刑部左侍郎以成林為刑部右侍郎台斐音為廣西巡撫調慶汶  
 為河南布政使以盛倬崇為陝西布政使徐忻為江西按察使江曲  
南河庫道遷○丁巳王集以疾免以戴均元為左都御史顧德慶為吏  
 部右侍郎○戊午諭大學士會同戶部議駁百齡朱理奏請江蘇  
 及各省當舖按照成本多寡將息銀輸納二成分作五年給還一  
 摺國家理財制用政有常經即權宜取濟亦當準事理之平若商  
 民權子母逐錐刀其事至為纖細豈應官為覈計今該督等欲按  
 當商成本責以輸納又恐取民非制請分作五年如數給還無論

一出一入甚滋煩擾試思地方官勦借所部財物尙干功令况以經國之需而謀及庶人不已喪乎至原摺內稱當商等多係仕宦舊族各有報效之心此語尤屬虛誕仕宦家固亦有治生營運者然此輩大抵市僧居多強其所不欲而濫及名器亦太不計利弊重輕矣見在帑項雖未饒裕然綜覈出入尙不至卽形支絀何速謀及下策若此實屬鄙陋日前阿克當阿曾有此奏朕以伊係內務府人平日歷任不過鹽樵諸務未諳政治無足深責當止降旨申飭百齡雖亦係內務府人伊係翰林出身歷任封疆擢至協辦大學士朱理亦由翰林洊升侍郎巡撫不應識見庸陋同爲此不學無術之言除所奏議駁外百齡朱理均仍交部議處○己未

皇五子緜愉生○壬戌諭賽沖阿等奏報南山老林內外漢江南北全行肅清一招陝省匪徒萬五等因木廂停工乏食糾集夥黨

分路搶劫經朕特派長齡楊遇春等督兵勦辦復派賽沖阿帶兵由川界堵截各路將弁兵丁奮勇爭先所向克捷將各股賊匪次第殄除其勦散零匪竄回老林等處者見據賽沖阿分派官兵赴甯羌略陽一帶逐細排搜長齡楊遇春亦自西向東接捕共計各路鎮將接獲及寨民縛獻者又有五百餘人悉行正法實無遺孽賽沖阿會同長齡等遵旨由六百里加緊馳奏此次勦捕南山匪徒辦理實爲迅速賽沖阿長齡楊遇春朱勳及鎮將備弁等業已疊次降旨優加恩獎分別升擢所有出力兵丁除吉林黑龍江兵六百名俟到京之日再加賞賚其陝西甘肅四川三省征兵著該將軍等查明將已經拔擢賞戴翎支及僅止防堵者扣除外其隨營打仗兵丁加恩普行賞給一月錢糧以示朕嘉獎勤勞恩施周備至意○命減各省軍流以下罪

閏二月甲子諭昨據拉旺多爾濟奏伊祖超勇親王策凌入祀賢  
良祠牌位本在前祠安設二月三十日伊子巴彥濟爾噶勒詣祠  
行禮見策凌牌位移在後祠東閒等語當卽降旨交軍機大臣傳  
到太常寺堂官及看守祠宇官員訊問哈甯阿色克精額二人先  
行來圍詭稱因係埽除龕座搬移後安設錯誤經朕指出欺飾情  
節種種不符諭令軍機大臣覆加嚴詰據看守祠宇之應祀官單  
春成供稱上月二十七日成甯哈甯阿俱在賢良祠承祀祭畢成  
甯因祭文內止有怡親王及巴克什達海之名而無策凌之名令  
將策凌牌位與巴克什達海互移哈甯阿亦自認是日同在祠內  
隨同附和未經阻止其時色克精額實未在祠詢之成甯據稱伊  
未經奏明輒將祠內位次互易實屬冒昧求從重懲處等語賢良  
祠安設牌位自有一定次序成甯卽因祭文內無策凌之名疑及

向來安設錯誤意欲更正亦應詳查例案奏明請旨乃率逞臆見  
擅自改移成甯年老糊塗福薄災生任意妄爲豈復能勝尙書之  
任著以藍翎侍衛自備資斧前往新疆換班以示懲儆哈甯阿於  
成甯私移賢良祠牌位時未經阻止已有應得之咎及傳旨詢問  
又復捏詞支飾色克精額於此事當時雖未與聞不應與哈甯阿  
隨聲掩飾伊三人均係棄瑕錄用之人厥罪維均斷難輕恕本應  
板責訊問姑從寬免俱著交部嚴加議處應祀官單春成聽從堂  
官指使著無庸議尋議革職得旨哈甯阿色克精額著加恩以六  
品贊禮郎補用○勒保以病乞解任命仍留大學士在家食俸○  
以和甯爲禮部尙書文甯爲熱河都統轉秀甯爲吏部左侍郎調  
佛住爲吏部右侍郎穆克登額爲禮部右侍郎那彥寶爲工部右  
侍郎以英綬爲理藩院右侍郎

由內閣  
學士題

○乙丑以姚文田爲內閣

學士

由詹事

○丁卯諭散秩大臣並無辦事之責嗣後無論正委如

有擢至都統者俱無庸兼散秩大臣著爲令○戊辰 上閱火器

營兵○內閣學士阿隆阿緣事降調○庚午諭滑縣知縣強克捷

猝遭逆匪搆亂慘及全家殊堪矜憫著於韓城縣爲之建立專祠

將強克捷並伊家從難者一併列祀以旌蓋節又據章煦奏稱逆

匪馮克善於上年劫出李文成突入縣署時將強克捷戕害強克

捷有女挺身罵賊不受污辱慘被賊匪倒釘廳柱擲斃命並著

查明據實聲敘奏請建坊以慰貞魂○辛未諭侍講學士蔡之定

奏請行用楮鈔一摺此奏泥古迂謬斷不可行前代行用鈔法其

弊百端小民趨利若鶩楮幣較之金錢尤易作僞必致訟獄繁興

罹法者眾殊非利用便民之道且國家經費量入爲出不至遽行

匱乏何得輕改舊章利未興而害已滋甚乎如係臺諫之員建言

紕繆因其與有言責尙可將原摺擲還無庸置議該學士係文學之臣以迂腐之見率陳奏牘實屬越職蔡之定著交部議處以爲妄言亂政者戒○甲戌諭松筠奏審明玉努斯邀功捏報妄殺四命及擡價賣糧苦累回眾各款分別定擬一摺此案玉努斯捏造逆裔薩木薩克子嗣遣人帶信斂錢將毛拉素皮等刑偪成招四人同罹重辟業據玉努斯供認屬實本應照松筠所擬抵罪惟玉努斯因姦娶僕婦色奇納被其鎮壓蠱惑種種唆使以致迷惑顛倒行類瘋狂業將色奇納正法玉努斯尙有一綫可原且伊祖額敏和卓著有勳勞伊父伊斯堪達爾宣力多年姑援議功之例稍從末減玉努斯著加恩免死解往伊犁永遠監禁案內首先誣捏之阿布都拉仔斯一犯及肆行迎合之伊弟里斯巴克依一犯實屬罪無可貸松筠於審明後已按例正法其阿布都拉一犯妄擊

無辜但到案卽行供明著照所擬免死發往黑龍江給兵丁爲奴其餘各犯均著照松筠所擬完結至從前被誣案內發遣黑龍江之回子呢雅斯素皮庫察克二名及毛拉素皮等四名緣坐家屬自應一體昭雪卽行釋回其呢雅斯素皮庫察克二名於歸途經由吉林已罰令鐵保捐給盤費銀兩並著松筠傳諭哈豐阿該回民路過烏魯木齊時亦令捐給銀兩以示罰懲其另摺所奏查鈔估變贓物除解京交納外餘著松筠查明被累回眾及壘站回子一體給賞至被誣之毛拉素皮等四名家屬及見在釋回之呢雅斯素皮庫察克二名無辜冤濫情殊可憫著松筠將鈔變銀物優爲賞給以示矜恤葉爾羌阿奇木伯克貝子邁哈瑪特鄂散等隨同松筠平反此案認真查辦貝子邁哈瑪特鄂散著加恩賞給大段二匹阿奇木玉素布伊薩克瑪木特三人各賞給大段一匹卽

於該處庫項內動用分賞以示獎勵○丙子展賑陝西被賊滋擾之蓋屋等八州縣並予修屋銀○辛巳諭江南邳宿運河向賴東省微山湖潴水濟運定例夏秋閒收水一丈二尺以資次年鋪放卽遇水短之年亦總收至九尺一丈以上從無不敷鋪灌之事茲據吳璣等奏勘查微山湖本年僅止湖心存水二尺及一尺八九寸不等實從來所未有而毘連微湖之南陽昭陽及東岸獨山湖又皆淤成平陸更無可導引之水此皆李亨特在任時因循貽誤疲玩耽延厥咎甚重近又風聞李亨特革職留工效力並不常川駐工仍在濟甯居住公館擅用文武巡捕及差弁多人竟與見任總河無異謬妄尤甚伊係屢次獲咎棄瑕錄用之人不知激發天良小心愧奮旣已玩誤公事罷斥後仍恣意放縱不知儆畏李亨特著傳旨拏問交吳璣同興派委委員迅速押解來京交刑部治

罪○乙酉諭河南歲搶修經費舊例每年動用銀五十萬兩自嘉慶十二年加增料價以兩倍爲止總不得過一百五十萬兩之數以後每年題報俱未逾額此次報銷十七年歲搶修工程用銀至一百五十九萬兩較之倍加之數又復增多若不嚴行駁斥必致逐歲漸增無所底止所有此次逾額銀九萬餘兩卽著黎世序及承辦各工員按數分賠不許再藉詞登覆黎世序仍著傳旨申飭嗣後歲搶修經費該河督務遵照原奏均勻覈計不得逾一百五十萬兩之數如有撙節據實題報其逾額者卽照此次之例罰賠示懲○命減發遣新疆情輕各犯罪○丁亥諭朕閱 皇考高宗純皇帝實錄乾隆四十六年查辦各省武職名糧裁添養廉挑補實額一事曾據大學士阿桂奏稱國家經費驟加不覺其多歲支則難爲繼此項經費歲增三百萬統計三十餘年卽須用七千餘

萬兩請將武職議給養廉所扣兵餉除邊疆查明增添兵額外其餘腹省均可無庸挑補實額等語當經欽奉 諭旨國家經費原當量入爲出而足兵衛民不得稍存靳惜之見阿桂所奏部庫出入大數大臣謀國自應如此但泉貨本流通之物財散民聚聖訓甚明與其聚之於上毋甯散之於下且在官多一分卽在民少一分見在戶部庫銀尙存七千餘萬兩何必於此事總總過計所有阿桂原奏並此旨一併發鈔著大學士九卿科道詳細妥議具奏欽此旋經廷臣議將直省所裁名糧悉行挑補實額仰惟我 皇考深維財散民聚之義損上益下惟願出帑藏以裕軍國 聖訓煌煌高邁千古誠非一切籌策會要所敢幾而當日建議之初阿桂通盤計畫逆料及數十年後經費難繼其深識遠慮亦不愧老成謀國計此項經費自乾隆四十六年至今三十餘年所用已逾

於所存且自嘉慶元年以後辦理軍務河工以及各省蠲緩賑濟每歲度支經費之外所出又豈可萬億計設此時府庫充盈仍與昔年無異則朕亦惟常守散財之訓豈肯鯁鯁計量然使乾隆年間庫貯情形亦同今日則量入爲出我皇考當日亦本不以阿桂之言爲非况我朝兵制定額已久自增設名糧額缺以來聞各省營伍積弊相沿仍屬有名無實於武備亦未能大有裨益立政之道貴在因時制宜其應如何將增設名糧額數酌量汰減仍復還舊制之處著大學士軍機大臣會同兵部詳悉妥議具奏○戊子諭都察院具奏控案每於摺內聲請敕交該督撫審辦或因其曾在督撫衙門控告卽請欽派大臣審辦甚且因有欽差大員在外查辦事件輒指名請交欽差某某審辦舊習相沿大屬非是各衙門具奏控案朕覈其案情輕重或敕交督撫提訊或派員前

往審辦其中自有權衡豈臣下所得妄擬嗣後該衙門具奏控案止應將情節詳悉敘明其會在本省何衙門具控幾次一併聲敘不准用請旨敕交查辦字樣如再有率行擬請者必將該堂官懲處不貸○以恩爾玉福熙昌俱爲內閣學士恩爾玉福熙昌由刑部郎中選○予死事河南滑縣教諭呂秉鈞巡檢劉斌典史陳寶勳世職○調盛悼崇爲甘肅布政使何銑爲陝西布政使○纂輯全唐文告成

三月丙申諭馬慧裕奏各省分發道府丞倅人員補缺無期請於道府選缺出時一缺歸選一缺外補請旨缺出一缺由部請旨簡放一缺由該督撫開單保奏其同知通判不論何項缺出部選外補相閒輪用等語所奏大屬非是部選道府丞倅之缺各有定例不容稍紊若將應選之缺半由外補銓法必致溷淆至道府請旨

之缺均係繁要尤非捐納初任人員所能勝任若如所奏分班開  
補不稱職者必多於吏治大有所損馬慧裕所奏不可行著交部  
察議仍傳旨申飭○戊戌命減發遣黑龍江各犯及軍臺效力官  
犯罪○己亥 上親耕藉田○諭宗室鄉會試取中用一文一詩  
已屬優異若不加以覆試無以鑒別真才著自本科爲始宗室會  
試中式者傳集在圓明園正大光明殿覆試屆時禮部奏明另定  
試期無庸與本科中式貢士同日其試題仍用一文一詩著管理  
宗人府之王公等先期傳示應試各宗室舉子俾共聞知○辛丑  
諭國家不得已而用兵所以戡除暴亂安定善良卽行師絕域亦  
止於斬馘擒渠尙當秋毫無犯以肅軍紀至於內地亂民原係獄  
吏捕治之罪止緣人數眾多不能不藉兵力以速殲除所謂大刑  
陳於原野期以當罪而已領兵將弁皆當深知其義約束士卒俾

閭閻良善同登衽席方稱朕用兵衛民之意至克捷蕝事之日逆  
匪家屬例應查明緣坐其被難民人無依子女亦當由地方官撫  
恤收養若征兵凱撤之時任其紛紛攜帶在賊匪遺孽旣因此漏  
網而良民子女竟至遠離鄉土淪於婢僕此與俘獲何異甚非仰  
體朕惠鮮懷保之意也此次滑城用兵朕屢經申諭領兵各大員  
嚴飭該兵丁等毋許掠取財物而於攜帶子女一節實爲意計所  
不及朕先引咎自責那彥成等知愧與否清夜捫心自問可也若  
再不認真查辦罪逾重矣前據文孚奏到吉林黑龍江官兵有攜  
帶子女之事當經降旨查辦旋據管理健銳營王大臣覆奏並未  
分晰辦理實屬因循草率無恥無能昨據富俊查明黑龍江官兵  
攜帶子女分別將逆犯親屬照例緣坐凡良民子女派員解交該  
親屬認領其無家可歸者暫交該官兵收養所辦甚爲認真因交

軍機大臣傳齊火器健銳二營所帶子女覆加訊問其籍隸滑濟二縣者僅止十八名其餘一百三名多係順德廣平彰德等府所屬訊係該官兵等於凱撤時沿途攜帶領兵各員漫無約束大屬非是本應將該官兵等治以應得之罪惟念此次軍務告成極爲迅速其奮勇出力者吉林黑龍江官兵爲最火器健銳營官兵次之綠營兵又次之俱經著有勞績而攜帶子女一節又未經誡諭於先姑著從寬一槩免其治罪管理火器健銳營王大臣先經奉旨查辦頗預具奏實屬草率因循怠玩文字首先具奏富俊查辦認真均著加一級見在查出各幼孩內劉喜兒等六名伊父母均係不肯從賊致被戕害實爲節義可憫劉喜兒等六名每名賞銀二兩著該地方官妥爲收養訪明的確親屬再爲給領其有父母兄弟伯叔之四十名口每名賞銀一兩亦著各該地方官傳到親

屬令該幼孩認明給領如所指親屬先已身故他往卽於該處養濟院收養長大聽其謀生俱交提督衙門順天府派委文武各二員解送本籍地方官收領其無依幼孩七十五名口暫交該官兵等領回收養此與分給爲奴者不同不准作踐胡爲當如子女撫養將來如有親屬來京尋認者卽報官給領毋許勒指至此次在京各大臣侍衛官員曾經派往軍營者如有攜帶子女及其家人等攜帶者亦免其治罪俱著自行查明報出交軍機大臣訊明分別辦理如隱匿不報以違旨治罪並著吉林將軍等及此次調派征兵之各省將軍督撫副都統提鎮將該官兵攜帶子女俱詳細查明照此次章程分別辦理各自繕摺具奏如辦理草率及因循怠玩者俱以違旨治罪昨降旨令兵部定立例條著將攜帶良民子女及逆犯家屬如何分別治罪及領兵官如何議處一併詳議

具奏頒示遵行尋議上得旨均著照所議行王師輯暴安良首嚴  
軍紀律載官兵擄掠人口若於已附地面擄掠者不分首從皆斬  
監候此指行師外域新附版圖者而言尙當恤其人民以示除暴  
施仁之意况內地編氓本吾赤子除亂逆者按法誅鋤外其被難  
流離男婦子女皆應亟爲撫恤若官兵偪脅擄帶豈非自相擄掠  
耶所有此次攜帶幼孩各官兵均屬有干軍紀本應定擬大辟姑  
念伊等平日未諳法律帶兵大員亦未先申明禁令是以槩從寬  
宥著該部將定律同此次議准各條款卽行刊刻頒發京外滿漢  
各營一體遵照並著於操演日期逐條宣講設遇有微調尤當剴  
切曉諭俾官兵等恪遵紀律約束嚴明儻有肆意違犯者則軍法  
具在按律治罪不赦○癸卯諭從來民爲邦本人君撫有區宇以  
不忍人之心行不忍人之政堯舜三代之治未有不以仁政爲先

者也朕仰承 天 考之命孜孜圖治無日不以愛民爲心胞與之懷痾瘵之念實由於中不能自己惟上年辦理遊案其情同臬獍自外生成者忽然無可矜恤此外億兆生民無不視同赤子誠求保乂惟恐或遺昨因凱撤兵丁有沿途攜帶幼孩之事朕憫其遠離所親淪於婢僕特降旨飭查派員資送回籍誠欲使之骨肉完聚以稍慰如傷之念其小民有控訴冤抑者亦必亟爲申雪以重民命朕宵衣旰食求莫圖甯所願者四海之內無一夫不得其所而已第九重之上安能徧及是在地方大員仰體朕愛民如子之心各率所屬民之所欲與聚之民之所惡勿施之拯其流離開其迷惑危者使安枉者使直以惻隱之心行慈惠之政庶幾閭閻幽隱咸遂其生善氣所積於以感召 天和雨暘時若年穀順成朕與天下臣庶共樂昇平有厚望焉○以長齡爲伊犁參贊大臣

加都統銜先福為陝甘總督阮元為江西巡撫桂芳為漕運總督

○調常福為戶部右侍郎以禧恩為兵部右侍郎轉英毅為理藩

院左侍郎以玉福為理藩院右侍郎由內閣學士遷○以朱理為內閣學

士調張師誠為江蘇巡撫以陳預為福建巡撫調陳希曾為刑部

右侍郎以鮑桂星為工部右侍郎由內閣學士遷○甲辰加明亮太子少

保賞雙眼花翎○乙巳諭上年九月十五日禁城滋事逆犯祝現

在逃未獲屢經降旨飭拏祝海慶等係祝現同族之人在豫親王

裕豐府內當差上年九月初旬並曾至祝現家中裕豐早應據實

奏明將祝海慶等交出詢問或用以作綫緝捕以期要犯速獲乃

匿不奏聞以致外間傳播有祝現在豫親王府內藏匿之言前日

朕派英和查拏祝海慶等三人裕豐尙不知自請處分昨復派縣

謝英和同赴該王府內查訊祝現蹤迹本日縣課等覆奏查詢情

東華續錄 卷二十七

形裕豐仍不知自請處分實屬糊塗不知大義裕豐著交宗人府嚴加議處○丁未諭前因訪緝逆犯祝現查知豫親王裕豐府內有該逆族人祝海慶等當差並伊護衛人等有事前聞知逆謀之事當將護衛拜紉阿及祝海慶等俱交軍機大臣會同刑部審訊茲訊明上年九月初八日祝海慶因事會至桑堡經伊族叔嵩山告以祝現等習教謀逆等語祝海慶次日回城卽向胞伯貴山述知於初十日回明佐領善貴參領伊精阿及護衛拜紉阿等拜紉阿等恐有不實商令傳到屯領催祝瑞令其具結再爲呈報拜紉阿先面稟裕豐裕豐漠不動念答以俟查明再辦及至十六日善貴等帶祝瑞具呈已在十五日滋事之後裕豐接呈次日復有不必聲張之語本日令管理宗人府王公會同軍機大臣詢問裕豐裕豐亦答前後情節屬實裕豐身爲親王聞有首告謀逆重情不

速行具奏又不轉報宗人府及留京王大臣追事後接收呈詞仍  
隱諱數月不奏實不知其如何居心昏憤糊塗罔知國家大義至  
於此極著暫行革去王爵交宗人府軍機大臣大學士六部尙書  
會同議罪具奏其拜紉阿伊精阿善貴既經呈稟則其咎專在裕  
豐惟伊等彼此推諉展轉取結遲延數日是其應得之咎拜紉阿  
善貴俱著開復原官伊精阿著回任俱交兵部議處嵩山於謀逆  
重情首先舉發祝海慶聞知卽向該管處據實首報均明於大義  
嵩山祝海慶俱著加恩賞給護軍校貴山一同稟報著賞給藍翎  
長伊三人撥在本旗大營當差○己酉諭莊親王縣課等奏會議  
裕豐罪名一摺裕豐上年九月初十日聞知祝海慶等首告謀逆  
若立時奏報迅將匪黨查拏則十五日禁城之變可以先事消弭  
其功甚大乃伊漠不關心遲延不舉實屬無福承受國恩止知因

循疲玩反罹重咎逮十六日接受呈詞維時鉅案已成然逆犯尙多未獲裕豐據實奏明仍可令祝海慶等作綫將祝現各逆犯按名捕誅何至逋逃日久而伊泄泄如前轉云不必張揚實不知其是何肺腑至前日事已訪出端倪朕特派縣課英和前往該王府查詢伊仍不知愧懼拘泥進班日期不卽來園請罪種種昏愎糊塗罔知大義皆出情理之外縣課等議請將裕豐問擬杖流圜實屬罪所應得惟念伊祖豫親王多鐸從前在開國諸王中勲績最著仰蒙 皇考高宗純皇帝復爵紹封追配 太廟國家議功議親載在令典朕推念舊勳宥及後裔裕豐賦性惰愚不能復列屏藩業已革去王爵加恩免其圈禁卽令在王府外閒房居住不准出門閒遊令其閉門思過上年議罰王俸十年除扣過本年春季俸銀外其餘未扣者著責令於兩年內全數繳出交納部庫其

應襲王爵著宗人府照例查辦○庚戌齊布森以讀本錯誤降調

以常亮為內閣學士由韓德○甲寅調明亮為左都御史和甯為

兵部尚書景安為禮部尚書由左都御史○乙卯諭前據刑部奏審訊

王三等句通天津鋪戶販運米石出城恐有回漕情弊當降旨交

那彥成查究茲據那彥成奏稱天津煙戶稠密惟藉商販米石接

濟刑部訊出該鋪戶盧德等自上年四月至今共買運細稜米一

萬四千餘石於全漕似無大礙等語奸商私運米石出城本干例

禁京城居民繁庶百倍天津此項私運稜米一萬四千餘石若云

可濟天津民食獨不計都城民食驟少此數乎况天津一帶為漕

艘經過通津正係回漕弊藪豈可不嚴密查禁著那彥成仍派員

確查該處私運米石若實係細米零星售買無庸究辦儻將麤米

攙混影射回漕即嚴拏按律懲辦以除積弊並著刑部將王三等

再行提訊該鋪戶等所買米石如有賣給旗丁回漕情弊卽確訊  
某幫某丁開單咨行該督按名查拏究辦○丁巳諭從來兵制與  
國賦相權而行我朝建設各省營兵久有定額其小有損益亦皆  
就地地方情形隨時酌定惟乾隆四十六年添補名糧額缺案內一  
時各省驟添兵六萬六千餘名爲數較多迄今三十餘年於武備  
無甚裨益而帑項已多用至四千餘萬前會降旨令大學士軍機  
大臣會同兵部將增設名糧額數酌量汰減詳議具奏本日議上  
朕披覽摺內見在各省額兵六十二萬四千餘名較之雍正年間  
及乾隆四十六年以前所增實多自應酌加裁減惟各該省地方  
情形有今昔不同者亦當熟思深慮各就見在經制參考先後所  
設兵數訊防控制情形將應汰應留通盤籌畫庶餉不虛糜而兵  
皆足用著各省總督山東山西河南巡撫成都將軍河道漕運總

督各將所屬標下各營及該撫提鎮協等營兵內每省可以汰減若干據實具奏彙交原議大臣再行覈議尋奏除直隸安徽山東河南陝西甘肅六省及河東河標或兵額本簡或控制緊要難以酌減外江蘇裁額兵三百六十五名漕標裁八十四名河標裁二十五名江西裁額兵一千八十三名浙江裁額兵七百二十八名福建裁添募暫設兵一千三百五十名馬五百六十四匹湖北裁額兵一千六百三十六名湖南裁額兵一千五百五十四名山西裁額兵一千八百六十五名四川裁額兵六百三十名廣東裁馬六百九十六匹廣西裁額兵六百三十名雲南裁額兵二千三百三十二名貴州裁額兵一千九百五十八名統計裁兵一萬四千二百四十名馬一千二百五十六匹每歲共節省餉銀二十七萬一千九百三十二兩有奇米三萬七千五百五十五石有奇從之

○戊午 皇后行躬桑禮

三

夏四月壬戌朔以直隸米價翔貴撥天津北倉米二萬二千石有奇備糶○乙丑諭據滿珠巴咱爾奏查明木蘭各處圍場牲獸甚少本年正二月間大雪數次至今尙未融化三月十九以後又連日大雪道途泥濘異常等語本年哨內入春以後雪澤尙少山路泥濘再經夏秋雨水自必倍難行走且各處圍場牲獸較少亦應略爲孳息所有本年木蘭秋獮典禮著暫行停止俟明歲照例舉行至今秋旣不行圍亦無庸臨幸熱河○諭御史孫汝奏各省赴京控告咨交本省督撫均有逾限未結者而山東省爲甚請旨飭令迅速辦結等語各衙門咨交本省控案前經立有定限逾限查參乃該督撫任意延宕罔知顧忌見在兩江及其餘省分均有十案至三四案不等直隸省有三十二案而山東省則竟有八十九

案之多雖經都察院屢次查參泄泄如故以致原告守候無期本年復紛紛來京具控其因循疲玩實爲尤甚同興等敢於如此疏懈不慮朕降諭旨拏問乎所有山東省未結八十九案著責成該撫同興與藩司朱錫爵臬司劉大懿三人卽速分提審辦勒限一年全數辦結並著伊三人每月將所分股內已結未結各若干案自行具奏一次若再有延玩是有心誤國必加懲處不貸其直隸省三十二案著交那彥成率同臬司錢臻迅速審辦亦著勒限一年每月具奏一次伊二人到任未久各案非由伊等積壓無所庸其回護但此後設再逾限則伊二人亦無所辭咎其餘各省未結之案並著各該督撫上緊清釐毋稍延緩干咎○丁卯諭軍機大臣等常明等奏涼山生番出巢滋事會商勦辦緣由一摺涼山生番因夷地歉收分股四出於銀廠溝那裏溝東鄉縣一帶焚掠滋

擾自應懾以兵威迅速勦辦毋令蔓延爲患此時常明已商令多隆武帶兵二千名前往會同永甯道劉斌相機進兵如軍威震懾該提督等到彼剋日辦理完竣卽飭令地方官將被擾難民妥爲安撫毋使失所儻該生番等仍守險拒敵多隆武不能辦竣常明不必親往著在省鎮撫料理地方事務賽冲阿素嫻軍旅著卽星馳前赴該處督率勦辦該將軍身受重恩自必倍加奮勉迅除草竊以靖邊隅川省距京較遠軍務情形俱著由五百里馳奏以慰懸廑○庚午諭李亨特前在河東總督任內因事獲譴發往伊犁經朕棄瑕錄用命往南河效力於承辦荷花塘漫工執持謬見以致壩身已堵復蟄僅予薄懲發往熱河嗣復擢河東總督李亨特屢邀破格恩施自應感激愧奮力圖報效乃於微山湖濬蓄事宜不能先期籌辦任其日就淤淺見在湖心存水僅止尺餘卽尋

常河泊亦不至枯涸若此李亨特廢弛河工貽誤漕運厥咎甚重  
且於罷斥後仍恣意侈慢不知儆懼部議發往新疆尙不足以蔽  
辜李亨特著先在部枷號半年再發往黑龍江效力贖罪○戶部  
右侍郎趙秉冲卒予祭葬賞銀三百兩治喪○以黃鉞爲戶部右  
侍郎由內閣學士遷○辛未以福勒洪阿爲內閣學士由奉天院卿遷○甲戌改  
福建分巡甯福道復爲糧儲道○乙亥 上閱健銳營兵○己卯  
諭朕聞裕瑞在盛京不能約束移居諸宗室諸宗室亦皆不服並  
聞伊初到時卽有蕩檢踰閑之事當降旨令和甯緒莊查明參奏  
茲據和甯等覆奏裕瑞初到盛京卽欲買妾經民人張二等商令  
民人徐恭休妻假捏姓名賣與裕瑞爲妾伊等未經查參請交部  
察議等語裕瑞獲咎謫居盛京不知安分思過復買有夫之婦爲  
妾卽此一端已屬無恥妄爲其別項劣蹟亦無庸再行查奏裕瑞

著在盛京嚴密因禁派弁兵看守不拘年限張二等照例治罪擬  
 結和甯緒莊先未參奏迫降旨查詢仍意存掩飾僅自請察議不  
 足示懲緒莊身係宗室不免有心袒護著交部嚴加議處卽來京  
 聽候部議其所遺盛京副都統員缺卽以和甯降補無庸交議晉  
 昌未到任以前盛京將軍事務仍著和甯署理祿康在盛京居住  
 頗知感畏約束眾宗室亦甚妥協著加恩賞給主事戴用四品頂  
 帶與文弼傑信一同辦事○以裕豐弟裕興襲豫親王爵○和甯  
 以陳奏掩飾解尙書任以瑚圖禮爲兵部尙書轉穆克登額爲禮  
 部左侍郎以寶興爲禮部右侍郎由內閣學士遷○庚辰 上詣 黑龍  
 潭祈雨○是日雨○調徐斡爲湖南按察使恒敏爲江西按察使  
 ○壬午諭桂芳由嘉慶四年翰林海推侍郎雖資格未深然在內  
 廷行走有年南書房上書房軍機大臣內務府大臣俱供職辦事

明白細心人亦直爽本年春閒派令前往廣西審辦事件旋任漕  
運總督伊行抵湖北省城染患時疫病證降旨令其安心調理方  
冀不日就痊茲據張映漢奏報桂芳於本月初十日因病溘逝良  
才難得深爲悼惜著加恩晉贈太子少保加尙書銜所有應得卹  
典該部察例具奏任內一切處分悉予開復著伊弟桂萑帶同伊  
子炳奎馳驛前往湖北接伊靈柩沿途官爲照料到京時准其入  
城治喪伊曾授三阿哥讀書俟伊柩入城次日派三阿哥前往奠  
酒其隨同桂芳出差之戶部員外郎玉符亦因染疫同日身故著  
加恩交地方官將其靈柩妥爲照料隨同桂芳一路行走到京時  
不得入城尋予桂芳祭葬諡文敏○以李奕疇爲漕運總督許兆  
椿爲浙江巡撫轉陳希曾爲刑部左侍郎以朱理爲刑部右侍郎

由內閣○丙戌賜龍汝言等二百二十六人進士及第出身有差

○丁亥諭朱勳奏查明張克捷二子先經回籍並隨任被戕親屬一摺上年逆首林清勾結河南賊匪李文成等約期九月十五日進京滋事經滑縣知縣強克捷先期訪聞拏獲李文成牛亮臣等犯嚴刑拷訊賊黨馮克善等因逆謀已洩糾眾劫獄不克分派進京逆首林清不知音耗就近分遣逆黨入城而外援斷絕立就誅夷該首逆猶懷疑株待旋就捕誅李文成雖一時免脫緣刑傷過重不能遠逸經官兵進勦戮於司寨強克捷職膺民社能周知一縣之事首先訪獲逆黨俾林清李文成等失約敗謀後先授首實屬傑出良臣功在社稷且以身殉難閩署被害者至三十餘人深堪嘉憫覽奏揮淚不止前經降旨照知府例賜卹入祀京城昭忠祠尙不足以酬忠靈強克捷著加恩賜諡忠烈賞給騎都尉世職罔替伊長子強逢泰卽著承襲騎都尉服闋後送部引見次子強

望奉著賞給舉人文武聽其自便准其一體會試強克捷長媳徐氏抗節不辱挺身罵賊致被活釘鬻割拋棄遺骸尤爲可慘著賜諡節烈誥贈恭人照例建坊旌表並著朱勳遵照諭旨在韓城縣爲強克捷建立專祠前層設強克捷牌位後層設節烈恭人牌位其從難三十五人俱分次設牌從祀地方官春秋致祭以慰忠貞初次致祭著巡撫朱勳親詣拈香至韓城縣地方登仕籍者有強克捷之忠良前大學士王杰正色立朝亦籍隸該縣士風瀄茂宜示優旌著加恩賜祭一壇仍將韓城縣文武舉額各增五名永著爲例用示朕獎忠勵俗之至意○己丑以王以銜爲內閣學士

選事

五月乙未諭據初彭齡等奏查明成林原參署融縣知縣錢培善接緝盜案規避捏供實係屈抑請將草率定案之知府臬司一併

解任歸案審辦一摺此案韋弟大家被盜係十二年九月之事懸  
閣多年因循息玩其歷任遲延各員及督催不力各上司均干嚴  
議成林並未據實查參錢培善於上年六月甫經到任因犯供翻  
異詳請批示並無不合乃成林挾其稟揭前任虧空之嫌嚴參韋  
職實屬任性作威不公不法承審知府張業南迎合上司臬司張  
凱元率詳請參著一併解任交初彭齡等提同全案人證秉公嚴  
審分別定擬其從前延案不辦各員及歷任各上司一併查明參  
奏○諭軍機大臣等松筠等奏吐魯番回眾交糧當差頗覺苦累  
必須量爲調劑該處地方宜種木棉近來種植甚廣再有南路皮  
張商販雲集每因自相交易時滋訐訟莫若官爲經紀按則徵稅  
在於城鄉適中之區設立經紀數名給與官秤設票評價每兩徵  
收三分仍招股實良民詳請給帖責成該同知經理試收一年得

有成規再行定額所有抽收稅銀每年撥出十分之三由該同知分給四佐領回子並軍臺當差回子以濟困乏其餘稅項解歸道庫以充經費等語吐魯番種植棉花均係回子地畝出租招種若卽在產花之區抽收稅銀恐滋紛擾如於商販經由處所如嘉峪關等處酌量抽稅事或可行高杞係烏魯木齊都統見署陝甘總督著詳細查明此項棉花與南路商販皮張從前嘉峪關等處曾否定有稅額並體察吐魯番回眾如何苦累情形驟增此項花稅有無紛擾之處不妨寬以時日務計議周妥據實具奏○成林革職逮問調那彥賢爲刑部右侍郎英綬爲工部右侍郎轉玉福爲理藩院左侍郎以熙昌爲理藩院右侍郎由內閣學士遷○丙申許兆椿以疾免調陳預爲浙江巡撫以王紹蘭爲福建巡撫調李長森爲福建布政使以額特布爲雲南布政使史致光爲雲南按察使由

道○丁酉諭同興奏遵旨分提京控各案趕緊審辦一摺山東省積案逾限未結者幾及百件皆由巡撫蒲臬因循疲玩不認真清釐所致厥罪維均此內同興上年帶兵防堵離省數月兼有查河催漕等事未能專心鞠訊其咎尙有可原至藩司整飭吏治臬司綜覈刑名朱錫爵劉大懿終年安坐省城一任地方要務延閣廢弛咎無可辭朱錫爵劉大懿俱著交部嚴加議處卽開缺聽候部議○調慶炆爲山東布政使以諸以謙爲河南布政使和舜武爲河南按察使由廣東高廉道遷○以程國仁爲山東按察使由光祿寺少卿遷○命旌表直隸山東河南上年死節紳民士女○己亥諭那彥成奏報二麥約收分數一摺單內首開大典宛平二縣約收八分一派虛詞全不足據卽此可見悠悠居心怠玩從事大約無福受恩矣本年畿輔一帶雨澤稀少麥苗黃萎都城附近田畝朕出入經過

留心察看其收成不過在二三分之間今那彥成奏報八分其不實孰甚以此類推其餘各屬稟報真偽亦豈盡足憑食爲民天最爲地方重務該督於民生本計漫不經心若此恐汝用心於無用之地俾盡作夜欲做福康安之行爲乎著傳旨申飭所有收成分數單著發還俟各屬地方二麥割穫登場後確查實在收成分數再行具奏若再行虛飾經朕查出必將該督嚴懲不貸○諭軍機大臣等蘇楞額等奏審擬太監小劉進喜向書吏于漢索取麩料並順義縣辦差給與各太監他坦食物錢文一摺朕每遇巡幸禁止太監等向地方官需索屢經嚴諭至再至三乃猶有太監書吏彼此交涉散給供應之事據于漢供南石橋三家店鬻髻山三處係順義縣承應密雲瑤亭子等處係密雲縣承應近年均有折給四執事他坦十三處搭鍋臺豫備民夫水桶錢文及雞肉麩米等

項業將太監等治罪並書吏于漢問擬杖徒著那彥成卽查明近五年以內濫給太監供應之知縣先行革職指名嚴參交涉之書吏均照于漢之例問擬杖徒失察之總督藩臬奏明交部議處本年八月間祇謁 東陵著那彥成先期嚴行飭知所屬各州縣嗣後踣路經過地方如有太監需索之事卽稟明總督據實奏聞懲辦若隱匿不奏或私行給與經朕查出必將該州縣及該督一併治罪不貸懷之○辛丑予死事河南濬縣從九品徐沅世職○甲辰諭高杞奏審擬同知吳邦壩將縣役薛寅柳賁斃命一摺外省辦理庶務非失之不及卽失之太過總未能準乎情法之平近日民間訟獄玩法逞刁而胥役爲尤甚非齊之以刑無以生其儆懼但刑法自有一定規條不可濫事酷虐此案同知吳邦壩審訊縣役薛寅等不過尋常爭段細故掌責數至二百板責數至八十又

濫及無辜婦女以致醉寘傷重斃命實屬違例濫刑暴虐乖張該  
署督擬以革職遣戍是其罪所應得至請於省城枷號一箇月此  
則未免失當國家設官治民置胥役以供指使其分至爲卑賤若  
官員以杖斃胥役枷號示眾恐奸胥蠹役因此長喪官藐法之心  
非所以嚴尊卑上下之制吳邦壩著革職發往伊犁充當苦差無  
庸再加枷號餘著照所擬完結○丙午以阿隆阿爲內閣學士焘  
常寺○丁未諭軍機大臣等那彥成奏自陳悚惕下忱請交部嚴  
議一摺事君之道總在毋欺言行不符終遭禍患爲政之道總在  
務實實則有功虛則罔效那彥成近日悠悠怠惰不實心任事今  
見朕訓飭諭旨則鋪敘惶悚之詞奏請交部嚴議伊豈不知此等  
部議處分卽議革職每多加恩改爲留任者仍屬有名無實朕果  
欲懲辦那彥成無難立降諭旨又何必待伊奏請耶所有那彥成

自請嚴議之處著無庸議上年林清句結李文成通同謀逆彼時特召那彥成授以總督之任旋又補放直隸總督原將此鉅案責成那彥成一人令其肅清京外翦淨根株並非專攻滑縣屯聚之賊卽爲了事嗣那彥成將滑城克復朕念其辦理迅速先行懋賞酬庸伊必感激奮發力圖報稱乃那彥成自到直隸總督任後諸事因循復萌故智中道而立怠玩疲庸竟似功業已成見在逃竄各匪與伊無涉者試思未獲各賊如祝現劉呈祥劉第五董伯旺支進才劉成章六犯皆林清李文成心腹黨與該犯等一日不獲則逆案一日不完要犯不可一日稽誅其次要五十餘犯亦皆助逆之人那彥成身膺重寄責無旁貸數月來未獲一犯甯不知愧知懼若云該犯等免脫遠颺不在近地則本日廣惠奏到伊於賈坻地方拏獲李玉麟李玉奉二犯卽係指名飭拏次要五十餘犯

單內之人寶坻地方非該督所屬州縣乎那彥成此時當大加愧勵清夜捫心何人之孫何代之臣賢不肖之名汝自揀擇認真督率文武官弁將未獲各犯上緊訪緝以結鉅案如將要犯速獲朕仍當渥沛恩施若至秋令仍泄泄沓沓一犯不獲必將該督治罪亦不待伊自行奏請矣○戊申諭各衙門辦事敏則有功全在該堂官勤以率屬力除因循疲玩積習昨日朕披閱光祿寺進呈黃冊係報銷上年十二月動用錢糧清漢文俱僅止數葉何難及早繕辦乃遲至六月之久始行具題殊屬延緩光祿寺堂官俱著傳旨申飭嗣後該衙門報銷黃冊著改爲開一月具題毋許遲逾○庚戌諭軍機大臣等那彥成奏查明每年春秋二差需費銀數一摺並開單呈覽向來春秋二差車馬橋道等項例價不敷直隸省不無津貼但亦何至如該督所奏地方官需貼銀二十餘萬兩之

多實屬大奇若按款鉤稽必致又興大獄矣詳閱單內所開浮冒實所不免直隸官吏藉辦差爲名以少報多那彥成不加詳查卽據以入奏殊屬糊塗冒昧若傳旨申飭其單內由該省自行支銷者著該督率同藩臬二司詳細參酌大加覈減以節浮費毋得仍前濫行支用至所開宮門支應一單其所列各件固有實係備用者而虛開者亦復不少卽所開炕桌四百張大小桌椅二百四十張半桌五十張此等器具若如天津五臺等處行宮係由地方官豫備陳設者自不能不置備器具若春秋園附近行宮若由內務府管理其中桌椅等項一切齊全何須地方官另爲置辦其所置桌椅多至數百張行宮屋宇無多亦無處堆積其虛妄可知又如竹絲燈籠一千箇火把一千根行宮內從不需用此物其餘類此者尙多大率皆大小官吏備以自用者亦一併列爲宮門支應尤

屬不實朕已將此單發交總管內務府大臣查明刪減將必須備用者擇出覈定數目發交該省每次照數豫備將來差次由地方官將所備物件點交內務府大臣官員驗收再由內務府大臣發交各等處太監支領總不得令太監等與地方書吏私自交收以杜流弊又據另片奏太監等隨從出外麩草米豆等項恐其自向街市購買與外間市僧閒雜之人交往可否飭諭內務府大臣等將隨圍太監應給麩米食物覈定數目由州縣呈交內務府大臣發給等語所見糊塗已極太監等給使內廷禁止與外人交接如差次向地方官吏需索食物使費或藉以交通熟識此則必應嚴禁若伊等尋常購買食物與市販等彼此交易此則情事之常不得謂之交接卽如御園各處太監其日用所需原准其出福園門西南門自行購買並未加以飭禁若伊等偶食蔬果皆須向內務

府大臣代爲購備則繁細瑣屑成何體制況太監隨從出外賞給路費俾資食用設如那彥成所奏該太監等既領錢糧復令地方爲之代備供應有是理乎所奏斷不可行見在辦理太監小劉進喜差次需索一案順義縣知縣陳楷任聽書吏濫給供應咎有應得雖據那彥成查明舊習相沿並非有心交結茲當整飭之時不能不加以懲創已降旨將陳楷革職准其留於該省仍令幫辦差務如果辦差數次妥協無誤再由該督奏請開復其餘五年以內辦差各州縣人數太多著照該督所請查明同失察之總督藩臬奏明照例分別議處其密雲瑤亭濫支供給之書吏等仍遵照前旨確實查明照例治罪○以蔣予蒲穆彰阿俱爲內閣學士

左副都御史穆彰阿由通政使遷

○癸丑諭軍機大臣等百齡等奏三進漕船全

數渡黃請將催趲出力各員量予鼓勵一摺所奏殊不成話向來

重運漕船渡黃迅速比較上年日期早十餘日或早月餘始將催  
趨出力之員量加獎勵皆朕特降恩旨恩出自上該督等每屆糧  
艘北上派員催趨咸以爲常即使輓運安迷亦其分所應爲不當  
自行奏請鼓勵况本年渡黃日期較上年亦遲六日以閏月節氣  
計算遲至十餘日該督等卽應奏請治罪方爲正辦今奏請加恩  
此語出於何典姑念今夏東境運河水絀輓運維艱卽幫船早出  
江境轉致沿途擁擠故渡黃雖遲不復加以責備豈能復邀甄敘  
所有該督等開單奏請加恩之處著不准行嗣後每年重運仍應  
竭力趨前勿許再有遲逾○丁巳諭國史館纂辦臣工列傳向不  
按年分先後以次進呈其辦理章程本不盡一前日該館進呈和  
珅列傳和珅逮問伏法迄今已越十五年始將列傳纂進已太覺  
遲緩迨詳加披閱其自乾隆三十四年襲官以至嘉慶四年褫職

三十年閒但將官階履歷挨次編輯篇幅寥寥至伊一生事實全未查載惟將逮問以後各諭旨詳加敘述是何居心不可問矣和珅在乾隆年閒由侍衛擢大學士晉封公爵精明敏捷原有微勞足錄是以 皇考高宗純皇帝加以厚恩奈伊貪鄙性成怙勢營私狂妄專擅積有罪愆朕親政時是以加以重罰似此敘載簡略見距懲辦和珅之時年分未遠其罪案昭然在人耳目若傳至數百年後但據本傳所載考厥生平則功罪不明何以辨賢奸而昭賞罰國史爲信今傳後之書事關彰瘡不可不明白宣示所有承辦和珅列傳之纂修官著查明參奏交部嚴加議處其正副各總裁校勘疏漏均難辭咎除陳希曾甫經到京仍留原館無庸交議外董誥在館年久精神未能周到著無庸兼充正總裁仍交部議處景安見已年老章煦甫經到館均免議處著無庸兼充副總

裁著派曹振鏞托津潘世恩充國史館正總裁盧蔭溥充國史館副總裁將該館纂輯各事安立章程加意整飭其和珅列傳著另行詳查編次進呈尋奏刪纂和珅列傳之編修席煜請革職審訊得旨願純原纂和珅列傳彙本內本載有事實四條皆和珅罪狀仰奉 皇考高宗純皇帝飭諭加以譴責者葛方晉節去三條席煜節去一條其居心實不可問除葛方晉業經身故外席煜前已革職卽行押解回籍交江蘇巡撫張師誠嚴行管束令其閉門思過不准外出並留心稽察如有怨望詩文卽奏聞將該革員拏問治罪○成都將軍賽冲阿等奏進剿涼山番賊殲斃爲首兇夷畢格等○戊午以李鴻賓爲河東副總河

由巡漕給事中遷

六月庚申朔日有食之○壬戌諭董誥等會議松筠條奏節省新疆經費並查屯地抽收木植二摺烏魯木齊收捐監糧從前雖經

舉行但該處糧價近俱平減此時定額過少恐於內地收捐有礙  
若定額過多捐輸未能踊躍仍於倉儲無裨朕敬遵 皇考聖諭

著照舊停止永不准再言此事言者必誅其餘各款著長齡於到

任後會同高杞再行體察情形詳慎籌度分晰具奏○福昂緣事

降調調額特布爲浙江布政使以劉清爲雲南布政使由山東鹽運使遷

○調史致光爲貴州按察使伊湯安爲雲南按察使○癸亥諭御

史傅棠奏近日刑部保題員外郎郎中及派秋審處總辦司員該

堂官不問辦事能否資格淺深公同酌商輒以家貲殷富年輕資

淺之員濫行保派等語朕面詢董誥據稱近日該部因秋審處該

班聽事人員較少曾添派捐班司員七人兼秋審處行走等語刑

部總辦秋審處爲天下刑名總匯自應將在部年久諳習刑名之

員派令行走以資辦案今該堂官以年輕捐納人員越次派充此

等少年一無知識所謂未能操刀而使割未聞以政學者也此時  
名爲資其奔走之勞將來遇有升題保送等事卽指稱在秋審處  
行走豫爲占先地步必致各司厯練勤能之員轉爲遏抑殊不足  
以重公事而示甄別無怪乎嘖有煩言所有此次添派兼秋審處  
行走之邢承祖王玉璋盛思道廖均和慶崇慧趙協中俱著撤退  
飭令各回本司學習行走○甲子史積容緣事革職以葉紹楹爲  
廣西布政使由大理寺少卿遷張凱元緣事革職以趙慎畛爲廣西按察  
使由廣東惠潮嘉道遷○丁卯裁河南裕州州判改設滑縣道口鎮縣丞○  
甲戌四川涼山逆番平○乙亥撥福建龍溪海澄南靖長泰四縣  
歸石碼通判兼轄漳浦平和詔安三縣歸雲霄同知兼轄○張師  
誠乞假省親以初彭齡暫署江蘇巡撫由名場○己卯諭軍機大  
臣等那彥成奏直隸省自嘉慶二年至十八年積欠及大兵經由

各州縣民欠地糧並借給折色銀兩共銀三百四十餘萬兩米糧  
 穀豆等項共一十四萬餘石草六萬餘束為數過多請分別蠲免  
 十分之三四五分等語所奏乖謬之極直隸省前此辦理清查之  
 後業已嚴降諭旨各州縣不准絲毫再有續虧嗣後亦不得更藉  
 清查名目以為掩飾虧空地步那彥成到直未久復為此奏自係  
 該省屬員欲將虧空涸入民欠之內冊為此議覲覲邀免那彥成  
 受其德惠大膽冒昧率行入奏著傳旨嚴行申飭總不准再提此  
 事○辛巳潘世恩丁母憂調劉鑾之為戶部尚書以初彭齡為兵  
 部尚書仍署江蘇巡撫蔣予蒲為倉場侍郎山內閣學士○乙酉諭軍  
 機大臣等那彥成奏遵旨飭委員弁嚴拏逆犯一摺本日據劉鑾  
 之等奏據已革知州吳士鴻等在新城縣姚起營地方拏獲李天  
 相一犯訊據供認伊家三世習教該犯曾經首逆林清偽封自在

王其胤兄李天壽亦有偽封王號與知逆謀並在京南瓜里村擊獲支進才之胞弟李贏子卽支贏子一犯見已交部審訊李天相等均係從逆要犯或籍隸新城或在京南附近村莊潛匿又據方受疇奏在磁州擊獲滑縣逸出逆賊此皆那彥成所屬地方茲經順天府委員拏獲那彥成亦知愧知懼否耶順天府委員不過數人屢有緝獲要犯那彥成統轄全省所委員弁較順天府不啻數倍乃數月以來並未拏獲要犯一名其所稱遴派文武員弁分投密訪嚴拏之語盡屬空言看來那彥成於緝捕一事仍不免因循疲玩著傳旨嚴行申飭該督據奉此旨務卽嚴飭所屬將祝現等要犯並次要各犯上緊偵緝務獲毋稍疏懈仍遵前旨將緝捕情形十日具奏一次再朕本年八月間恭謁 東陵直隸應派隨扈官兵前日已經軍機大臣會議章程奏聞降旨令該督遵照辦理

近聞那彥成仍欲密備官兵二千名該督自帶一千名在前行走  
提督帶領一千名在後隨扈此斷不可變輿出入警蹕自有常儀  
若驟增兵衛二千前後擁護沿途駭人觀瞻實覺不成體制該督  
惟當遵照既定兵數擇其年壯技優在營年久可靠者挑選足數  
勿將無籍新兵廁入其各處經過城市村莊著慎委妥員先行逐  
細詳查臨時加意管轄勿容來歷不明之人叩關煩瀆以昭嚴肅  
此外毋得率行添兵若那彥成以派兵二千之說曾經奏聞仍私  
自豫備帶往屆時必將那彥成孽問治罪不貸懷之○丁亥增鴻  
臚寺學習鳴贊官二○戊子諭縣課等奏審擬贊禮郎富昌呈控  
伊妹夫筆帖式富勒洪阿懷疑出妻一案已依議行矣國家設官  
分職辦理庶政大小各有等差如事關重要非臣下所敢擅斷者  
自應奏聞請旨定奪此外應題應咨之件爲類孔多該管大臣應

照例分別覈辦蓮豆之事則有司存况夫婦不和家門猥瑣之事  
乎非爲上者憚於煩勞其體固當如是也此案富昌控伊妹夫富  
勒洪阿各情節止係夫婦閨房口角細故既在該管衙門控告弘  
謙等儘可自行審理咨部完結乃專摺具奏並於摺內恭書 陵  
寢字樣之下敘述猥褻語句實屬荒謬除前已降旨議處外茲特  
明白宣示近日內外臣工往往欲避專擅之名於事之不應奏者  
亦以一奏塞責以見事雖至瑣尙纖毫不敢欺隱設有大於此者  
必更無所諱匿不知人之才識見大者能知體要其遇事也確有  
權衡見小者日詹詹於凡近一遇重大之事懵無據依默然不敢  
置喙如上年林清於近畿旬結黨與散布謠言積有月日竟無一  
人聞知能先期舉發者可見大小官吏做精神於煩苛瑣屑之地  
而莫知政要舉其細而遺其大於國事又奚裨乎著通諭內外各

衙門嗣後於一切庶務皆當詳察事理審度重輕分別辦理勿外  
涉粉飾之迹中懷怠玩之心屢言小事而轉不言大事名曰無欺  
而欺罔更甚矣若因有此旨誤會朕意於應行奏辦者轉因循歷  
閣則獲咎滋重必不赦宥